

四庫全書

集部

欽定四庫全書

集部
白雲集卷二

詳校官中書臣徐志晉

中書臣劉源溥覆勘

總校官進士臣楊懋珩

校對官助教臣胡予襄

謄錄監生臣崔堂

欽定四庫全書

集部六

白雲集

別集類五明

提要

臣等謹案白雲集七卷明唐桂芳撰桂芳一名仲字仲實號白雲又號三峯歙縣人教授元之第五子少從洪焱祖學弱冠為明道書院司訓元至正中用薦授建寧路崇安縣教諭再任南雄路學正以憂歸明太祖定徽州

召對稱旨命之仕以瞽廢辭尋攝紫陽書院
山長卒年七十有三此集在程敏政所編唐
氏三先生集中廬陵鍾晦撰桂芳行狀稱其
文一以氣為主今觀集中有與陳浩書稱嘗
慕蘇老泉閉戶探蹟古今上下融液胸臆故
下筆源源而無艱險窘迫態輒謂文不可學
而能氣可以養而致此蘇老泉傳法也蓋其
平生宗旨如此故所作容與逶迤絕無聾牙

晦澁之習詩亦清諧婉麗頗合雅音嘗自稱
酒狂先生門人呂旭為作傳黃季倫為作歌
集中重修興安府孔子廟記稱龍鳳元年大
丞相統軍下太平克應天六年冬僉事黃公
行郡興安重建府學又贈汪德元序稱大丞
相吳國公又黃憲僉唱酬詩序稱大丞相位
冢宰之明年案龍鳳乃韓林兒年號大丞相
即明太祖蓋明興時實假偽宋號令故用其

紀年徽州改興安府在丁酉年見地理志其
為冢宰事則明史不載蓋必林兒所加官而
其後諱之此亦可以証史也乾隆四十三年
五月恭校上

總纂官臣紀昀臣陸錫熊臣孫士毅

總校官臣陸費墀

白雲集原序

夫六經皆文也獨進學解曰春秋謹嚴易竒而法謹嚴尚能知之竒而法非知道者孰能言之易曰日中見斗有其象而無其理也載鬼一車無其象而有其理也易雖竒而貴於有法所以為經三代而降莊騷非不竒也而昧於有法苟揚非不謹也而失於有嚴唐推韓退之竒而且法柳子厚謹而且嚴宋歐陽永叔正則正矣而近於竒曾子固謹則謹矣而近於嚴陳腐則不竒詭怪

則不法放恣則不謹齷齪則不嚴戛戛乎其難矣所以
詖辭淫辭邪辭遁辭而知其所蔽所陷所離所窮豈特
言哉言之精者為文文之精者為詩初無異理也予幼
承過庭之訓其未出鄉里師授洪杏庭先生陳定宇先
生胡雲峯先生既游江湖請業錢水村先生龔子敬先
生方攻舉子聲律之學而未暇慕於古文也寓金陵而
任閩南教官垂二十年重罹兵燹曰詩曰文舊藁放失
譬猶鏤冰刻楮畧無愛惜壬辰以後次兒文鳳編錄庚

子以來諸生吳匯哀輯甲寅予不幸盲廢王公貴人與
賢士大夫日過其門諉以文字潛驅默運如繹爾墨緒筆
懸萬言誰其念之第四男文奎拜而請曰庚戌徙居城
闈明年長兄文虎以茂才薦銓江安縣丞西蜀崎嶇萬
餘里契闊四五載憂愁憔悴每形顏面然於文字雖寢
食顛沛未嘗棄于懷所謂窮而後專專而後工也文奎
收而拾之一一繕寫非敢傳於他人庶子孫謹藏篋笥
耳予笑曰文章公器不為子孫賢愚而傳與否也退之

之子景誤金根之讀子厚之子周六幼甚其文盛傳初
不係其子也縱子孫不傳而人自傳之詩文不貴乎多
陳無已僅有思亭記黃樓銘咸知其能文也盧仝之月
蝕劉義之冰柱雪車盡知其能詩也予平生讀書不多
識字可數文不堪傳遠姑以文營文塚風氣融結待鍾
芝菌詩付詩瓢魚龍咀嚼可鼓波濤明邦家之禎祥承
江海之利涉後世指而告曰文塚者劉蛻也詩瓢者唐
求也疵賤姓名未致泯滅而詩卷當長留天地間也輒

以文章之利病諸子之得失而深告之文奎頗聰明有志于學更宜勉旃洪武九年歲次丙辰五月五日白雲翁唐仲自序

傳曰言之不文何以行遠甚矣乎文之足以行遠也日月星辰天之文也山河草木地之文也禮樂刑政威儀文辭人之文也六經出於聖人制作又得聖人為之釐正而論列焉千載之下不敢以文目之蓋理勝於文故也漢之司馬遷相如揚雄唐之韓愈柳宗元宋之歐陽

修王安石曾鞏蘇軾屹為一代宗匠未嘗舍文以傳苟
因事以明理第人品有高下學術有淺深豈離理據事
局局然可為文哉新安文公闕里即魯之洙泗也仲實
生於其鄉耳濡目染漸摩浸漬固有異於人者當時仲
實之曾翁丈筠軒先生以文章行義為士軌式微辭興
義過庭之訓甚富甫弱冠遊吳師授錢公水村龔公子
敬而鄭君明德陳君子貞蔣君子中皆折輩行與之交
二十八僑金陵李公晉仲李公五峰丁公仲容一見器

重其詩五七言歌行雜體聯成巨帙動盪揮霍光芒音
韻已沾沾鏘人齒頰三十有七任閩南教官尋聘烏克
遜平章家塾枯坐閭寥度無可努力繙閱經典史籍適
有遺翰林侍講虞公道園集一編仲實伏而攻之日夜
不寐從容法度心領神會雖不獲造堂齋截殆私淑艾
者自是研精務極其旨趣理融事覈洗濯鍛鍊卓然自
成一家之文山鏡石刻學士大夫抄寫不停手無何干
戈擾動文字散失所存十百於一二題曰白雲集畧仲

實嗣子文虎詒書江上請予序之嗚呼學之難成而時之不偶如此使仲實抱負不凡遭時承平而不罹於濁亂則典謨雅頌施諸朝廷薦之郊廟必可媲美於道園集矣顧乃遭回困躓與俗浮沈岐山之鳳不咏於詩西狩之麟僅紀於春秋嗚呼悲夫壬寅夏行郡新安幸與仲實接精神堅悍雄談娓娓其文氣逼人不敢迫視今以疵賤姓名得挂於集畧豈非疇昔之願也哉仲實名桂芳姓唐氏其行次仕宦言行之詳不系於文者茲不

著癸卯秋七月三洲陳浩養吾敘

欽定四庫全書

白雲集卷一

明 唐桂芳 撰

五言古詩

和鄭士恒所寄佳什

窮居寡塵鞅，遇物殊欣欣。
偶然坐石上，得見迴溪雲。
春風一披拂，落花急紛紛。
茅簷僅容膝，父老三四人。
閒談雜笑傲，庶以忘憂勤。

卷一
答仁和

卜鄰本鄉里相見即歡欣
人生散與聚有如川上雲
向來枉馳騫塵事多紛紛
晚節頗聞道尚友千載人
歎息復歎息別離負殷勤

今朝好風日出門隨所欣
南山拭晴翠矯首天無雲
山深寡人事可以遺世紛
乃知紫芝曲俱是逃秦人
荷鋤筋力倦未敢辭其勤

近闕一室扁曰琴書所
或者病其湫隘不稱隱

者之居也率二兒各和陶詩

伊予拙生理頗覺人事踈驅馳干戈際始構此室廬時
雨趁東作既耕仍讀書投老不願任何煩聘安車

又

兒童喜相報翠色饒園蔬雖無八珍味美酒相與俱百
年戒知足踰分非良圖所以謝榮辱俛仰常晏如

奮仁表賢友

我學二之中寸寸不得上十年慕道心望洋空惆悵刻

楮不勝勞射工輒抱恙至今衰遲姿白髮成老狀早交
槐堂仙家世出忠壯相傳好詩章未讀已傾仰猶思西
湖遊千金購朱舫荷盤擎露珠風側瀉銀浪惜無杜陵
狂顧欲鏹羣嶂欲問當時蹤奈少大父行青樓插酒旗
處處貨新釀一曲一足綾吳歛發高唱可憐干戈區將
軍坐武帳滔滔日夜流誰為百川障莫怪癡兒癡恁使
放翁放如何唐儒宗嗷嗷作辯謗

病中謝陸和夫饋藥

微暑不知夏好風生層波如何草徑塞返關養沉痾故人
倏相遇感激良已多手持千金劑蕩滌氣未和須臾
奏神效勃勃衰顏酡小兒強扶出一鳥鳴巖阿平生精
進念功名斂一蓑未虞即溘死瘦骨高峩明朝入城
市白日塵滿鞞松根茯苓熟早晚重來過

贈陳養吾

進士名浩
河南人

吾觀古人詩瑰怪無不有譬如嘗穀粟饜飫滿腹口千
載錦袍仙陳言付敝帚自媿隘九州英氣盪牛斗往往

說神仙更嗜盃中酒至今語鏗鏘端的傳不朽每笑昧
學徒效顰益增醜偶然識陳君泰華吞八九直寫胸臆
竒五色謝丹黝豈徒鍛鍊工未許造樓手所以雄世夫
每向洪荒剖頃刻數百篇爛熳煙雲走誰能扣靈扃定
有神物守嗟予晚聞道與俗常不偶昨題墨竹圖疾賞
播僚友嗚呼視夢夢詎敢辨稂莠自歸萬山中三日卧
至酉深慙下筆遲營吻欲悲吼君佩雙螭珠光彩照穹
厚我窮不自振蹭蹬成白叟明朝別河梁新水浸枯柳

又

文章固小技作者無數人寥寥宇宙內古道日以湮世
祖樹鴻業冠蓋何詵詵魯齋明正學識見真儒醇靜修
起巖穴名譽服薦紳嗚呼大江南虞老一角麟而今未
百年中原生棘榛不有大手筆何由救沈淪向來運甓
翁多士煩作新猶思二羽門一笑經幾春欲往抱貧病
骨瘦兩脚斂夜夜望文星磊落光如銀

昨歸自城府聞仁和彥克二君席上以詩爭雄長

故區區僭和一章以和其天倪以全其交道云
洛陽稱賈誼個儻真英才奈遭絳灌短薦剡非無媒程
吳偶相會一笑金樽開罵座似狂客痛飲各百盃始焉
喉吻渴碧海揚塵埃終焉肝膽露豈受旁人猜彷彿糟
丘築依稀玉山頽主翁興未盡欲去仍徘徊小冠二子
夏齊名兩東萊何須較勝負筆力如拉推伊子闕清賞
蹭蹬慙庸材肯同侯喜輩悲吟聲益哀流年青春老浮
世白髮催前修俱已逝後生胡不來堂堂宇宙內吾道

尊玫瑰

贈潘卿用太白送韋八之西京韻

別君春蠶生見君秋鴈去幾回拾海月照見珊瑚樹平生經濟心投老不得遇冉冉道途間兩鬢襲塵霧

送趙按察使

光芒使星動客賦金陵行老馬解離別迎風忽悲鳴刀筆擅高識霜臺著芳名昔來陽鳥集今歸春蠶生折此河上柳因之感多情

送程嘉貞憲僉

單居雨成滯我方倦躋攀胡為有遠別送客溪南灣雲
水暗易夕野花澹長閒豈不樂樽酒重此憂世難迢迢
客路遠軋軋輶車還山禽若無賴向人且綿蠻

贈李鍊師古體一首

英英山上雲泱泱澗中水雲水無定踪浮生安足恃所
以古達徒束髮棄妻子洞門掃松華丹竈鍊石髓功成
騎日月道大等天地宛陵識李君文華爛如綺抱琴坐

晚涼清音鏘玉指畫虎拂輕綃悲風生遠樹古道嗟何
如薄俗良已矣下乘淹驂騮太倉飽鼯鼠寧自守黃冠
切勿羨青紫愧予蓬藿姿失身在泥滓何當受真訣莫
夜三叩齒松根生茯苓一杯薦芳芷

答友

君今年五旬作詩似高適草書更神奇龍蛇走素壁人
言兩敵雄鈎銳適鋒鏑嗟嗟世運非英才委沙礫伊予
槐塘瀕繞屋樹蒿荻安得共講明大道在瓦甍平生企

金史四
卷一
酒徒陶潛與王績支離三醉翁不假飛空錫相望百里
間邂逅遂良覲自非絕俗資何由拯焚溺耿耿夜未眠
銀缸媚枯寂

謝劉仲脩同知垂顧槐隱

寒風攪樹梢索索如裂帛忽聞驕驄嘶知有遠來客是
時喪亂餘荒村斷人跡先生篤世交不憚遠行役唯餘
二三公光彩照圭壁奚啻冠蓋流乃是文章伯肯垂眼
長青慰我頭髮白第慙家計貧一身百憂集槃飴雜果

疏殺雞瘦露脊惜無橐中金飲酒盡數石因思先君存
當代尊矩獲久知伯仁翁論道最密勿危露感遺孤老
淚不堪滴而今相國賢慕士勤徵辟宜贊紫微垣聲名
動咍赫斗大番君城羣姦

闕

端坐黃堂中簾捲芝

山碧機謀驚鬼神號令

闕

平湖水茫茫高掛帆百

尺蟹螯斫雪肥楓葉經霜赤努力企前修歸鴻附消息
和權都事相期未至韻

生平厭萍逢老來味薑桂何如雞黍期好客千里至微

風斷且吹缺月吐復翳有兒幸守家力學廢一簣擔當
歸田園塵鞅暫息稅抱琴知音稀感慨不盡意

送魏君祥

日日出東城折盡春風柳柳條青如藍我髮禿於帚重
念龔黃流相看歲已久美玉恥雕鑿靈犀謝塵垢聽彼
閭閻民吃吃說賢守官清印封苔童瘦衣露肘退食何
遲遲吏胥縛卯酉情知無魚懸空槃雜糞非世人寵辱
驚駭汗恁奔走寸心難動搖處事輒可否紫陽華構成

功業豈云朽幸賴金石文
光芒盪牛斗慙非客坡門
舟送大江口江深吼巨濤
掣鯨以獻酒回首萬山中
甘作逃名叟

客有題問政丹房云長松
露鶴巢古樹穴蒼鼠喜而
作為五言

距城可數里著此突兀岡
中有學仙子能制不老方
尸解白日化賓雲無何鄉
至今荒塚上秋草眠石羊
門前松百尺偃蹇如人長
我老不可待稍稍鬚眉蒼

又

高人曉騎驢踏此日影春徘徊
憇芳草瀟灑哦長松道
士慣迎客美酒能潮容
如何雪色壁不畫雙飛龍
僅留五字句石礧鳴寒
淥舉頭起暮靄城邑何
憧憧

又

問政苦不遠祇在東南郊
當年賢太守詢俗留衡茅
土融迸穉笋露冷縣危
梢凡禽不敢宿逞逞雙
鶴巢我翁
勒雄文每讀泗涕交
何時坐琳館清響聞琅
瑯

又

山川鏗削痕開闢自太古孤筇逐春風翩翩燕方乳樓
臺付劫灰池館盡荒莽得非羣仙居下令六丁取老生
夙昔遊歲運機發弩相將把紫簫月明教鶴舞

又

呼龍種靈苗和露飲瓊屑却笑漢武皇求仙太痴絕王
母宴瑤池桃實露紅頰方朔真小兒咀嚙已三竊豈識
拳夫人清香散餘魄修短等百年夢覺南柯穴

四月九日辱伯文都事過紫陽精舍次韻

伊子遲暮姿有志未聞道陰陽無停機鬚鬢日以皓精
廬將落成四顧山水抱賢侯如魯僖在類民皞皞當今
萃英才邦國喜再造為覘爵祿崇吉語已三報

題雲山樓詩并引

鄭天駭以萬戶侯出殿於陔口陔口則歛睦之
衝要津也逆流而上懸灘很石九十餘里而為
歛順流以下灘舒石安水益淵洄二百七十里

許而為睦君構樓其間山巍然高且大白雲往
來勢欲飛動扁曰雲山諸公題品寢以聯軸遭
時睽離沉鬱武官方謹守疆場譏察服言不得
引去第歌雲山蒼蒼以希濶自期殆神交千載
之上而招羊裘翁者歟君與中丞伯庸為世戚詩
書沾被故其山水瑰奇之觀有自來也已詩曰

將軍構高樓
巖巖向溪口
好山千萬重
浩浩白雲走
朝雲護簷阿
暮雲宿窻牖
雲去山獨存
顏色青而黝
老校

插弓刀危立縛外酉過客肅容儀目逆為之久豈無書
生狂棄繻竟不取紫髯真將軍武帳映踈抑時時上樓
頭文氣盪南斗平生陳三洲翰墨不停手為君記雲山
聲價等歐九而我強題詩兩鬢禿於幕何時許相從隣
家夜賒酒鯉魚活欲飛前灘收故笥

用韻謝仲幾

北征杜子美南山韓退之二老不可作宇宙無此詩我
生三代後但感風俗醜遭時仍蹇蹇去國何遲遲吾道

重九鼎人情輕一絲竭來閩山中春雨長漓漓譬如耕
石田荒穢了弗治諸生列魚貫問道多狐疑豈知大化
心鳶魚咸恬熙自嗟為斗米折腰不能辭孰若趙氏賢
齋居坐無為胸中絕障礙遇物薄相嬉濁酒養身本黃
金媚盜資二郎志科目如摘頷下髭晚節扶鳩杖出處
靡不宜步履尋幽圃維舟向深池五月桑樹影堪紅醉
黃鸝安得孟東野雲龍常相隨

幽居

幽居謝塵鞅愛此芳菲時山將暮色斂樹與煙光宜樂
矣不知老嗒然遂忘疲寄語城市客紛紛亦何為

又

形神頗自適澹然無所營開門望遠山日夕雲氣生古
井人尚汲荒原牛罷耕一觴何足貴聊以陶素情

賦秋胡子

依依陌上桑婉婉桑間婦嫣然紅羅襦采桑濕香霧相
逢馬上郎停鞭偶回顧重遺買一笑脉脉此情露誰知

婦人身托生膠漆固本期骨肉親反被顏色悞憶當送
郎初徙倚門前樹篋笥滿征裳一一裁繒素綉為雙鴛
鴛猶懼觀者妬願郎早歸來恨不與俱去塵埃撲牀帷
蠅蛸網窻戶惟有白髮姑未忍衷情訴可憐不相識春
心挑中路蒼皇下馬時忽忽意未悟洞房掃春蠶一見
應愧負汝妾固可棄汝親寧弗慕黃金無虧盈白璧有
點污嫁夫恩義乖何如江水赴貞姿擅古今朽骨忘朝
暮悠悠懲愴心於焉發長喟

送湯生執中

薄暮雲已收微寒雨還作居人念睽離戚戚意不樂何
時竹屋眠共看燈華落

哭秋江黃處士

古道重死生交情念別離當年李相國好賢忘渴饑處
士坐東閣供帳出等夷開口論利害如斫生蛟螭鉉鏐
中肯綮一一隨所之或者勸筮仕掉頭從此辭裴回萬
山中慈母登期頤憶初母抱病醫藥弗克治神明托夢

寐指點令人為秋天割崖蜜暮夜還家遲猛虎臥當道
磨牙白差差須臾虎馴去熟視無猜疑母啖味益永母
療疾如期後增風木感常懷蓼我詩歲在己巳秋我寓
吳松涓處士乘單舸短袖風披披殷勤出畫軸墨汁猶淋
漓怒石迸欲落晴江吹漣漪松根著處士漆墨長鬚眉
俯瞰秋月渚嫋嫋釣竿垂可憐竟契濶消息兩不知偶
然識令子如公貌瓌竒問答未及了涕泗生慘悲處士
已仙去白楊冢纍纍吾意翁不死精氣常交馳化為岐

山鳳產作齋房芝不然丁令威重有歸來時

題胡子微重建紫陽書院詩卷

紫陽重首建誰能識本源當時韓太守皂蓋朱兩轡
宸御華札字大玻璃盆魏侯瞳若後補葺心力煩奈何
遭水厄維舟入市門尚遺文公像冠冕巍然存吾家竹
山叟移置城之墩微雲出暝壑層瀾汎晴軒華構等貝
闕星辰手可捫朝夕雜絃誦春秋薦蘭蓀諒惟德不泯
應有歸來魂嗟哉壬辰變逆燹天地昏荒基化榛莽野

牧羔與豚烏聊蟪蛄勢椎鑿斷石根庚子冬十月部使
涪翁孫興創顛已任嘖嘖極口論仲也罔報効三謁候
晨昏公騎青驄馬從吏相駿奔東關古郡學彼此貽後
昆疆界勿楚越大家剖籬藩胡君貳巖邑奉母勤清溫
堂前自茁筍堂北更樹萱妻兒常凍餒憔悴未忍言奇
勛著精舍兩廡翼高垣祠中師弟子嚮坐道益尊之僑
始未信衆議何喧喧而今幸竣事碑刻龜趺蹲諸生盡
稽首敢忘再造恩我老功不與長揖三槐村

翠屏軒

吾觀西南山靈山推第一拔地何太高去天不盈尺山
麓與山巔陰雨間晴日每逢樵牧歸衣裹帶餘漑曾聞
天厨聲羣娥事浣滌胡麻炊飯香麒麟擘乾腊至今靈
草叢長茂搖嫩碧微風有異香跪乳不敢食仙翁有曾
玄卜築載巨石月升滿堂明雲上半窻濕瀝池神魚遊
種樹慈烏集俊彥肯荒嬉良師重訓迪青燈寒更長黃
簾秋露入如何號翠屏方整勢屹屹平生劉屏山妙道

已破的爾翁人中雄豪氣渠未識三嗣鴻雁翔諸孫竹
梧立愧我貿易徒病眼魚珠泣安得效東坡朗然詠蒼
壁

投李近仁太守

公侯真人讀書眼如電昨朝出東門風雨得開宴氣
逸千仞岡文竒五色線下車未踰年衆喜破憂面向來
龔黃流史策一二見紫陽朱子邦前後多俊彥宸翰勒
堅珉遺勛在書院共惟隴西公作新殊不倦我老墮無

能時光薄秋扇

人生宇宙內夙志不得酬譬如太阿劍千金未易求如
何土花蝕遺棄不見收至今鄴城夜光燭盪斗牛儻無
張華識鉛刀與等儔客有異神器磨淬滑欲流分明聚
清淑爭此三尺秋茲馬重再拜持贈豈暗投無由佩津
水化作蒼髯蚪

哭黃與幾先生三十五韻

慟哭宇宙間奇才日淪落伊予童冠年用意臻傑作于

時覲黃君層空橫俊鷲明理識源流談經恥糟粕聖賢
未死心夢寐遞酬酢韓柳布骨筋黃陳遵矩矱嗟彼昧
學徒奚翅隔一膜青春坐精廬鞭算盡升勺會計當何
嫌與教樹邪郭宦海欲飛揚蹣跚病行脚僅僅如孔融
諸生聽鳴鐸高堂九袞親龐眉白於鶴館券具八珍怡
顏享真樂幽圃極經營平池謾䟽鑿美石象瓊瑰寒藤
等瓔珞舉目俱不凡宛若在丘壑吾翁八旬餘精神更
矍鑠商確文字中悠悠動清酌典型相繼亡鄉邦已非

昨日瘦色慘悽令人幾驚愕猶幸侍先生鍾情忘鄙薄
去冬訪隱君好詩倒囊素機鋒偶相逢大叫忽踊躍譬
彼兩將軍仆旗寧退卻俄頃出神奇屢戰氣肯索自歎
老難持相期校書閣感激知己言未信且愧忤夫何計
音來晨星隕天末當今世亂離萬死靡救藥生歸誰保
全吞噬人為柳新阡范家村有子端可托但棄窈窕姬
孤燈照簾幙荒城雪漫漫似怪東風惡慈烏號遠林饑
鼠走敗籜回首百千秋聲名寄寥廓

暇日與黃季倫鄭士恒石池看雨

池上數點雨俄然水紋生水紋圓又碎因之感物情游
魚千百輩么荷四五莖明當慘離別奈子東南征

題張仲賢贈言卷軸

彼美張令尹僑居向澄塘羣氓懷遺愛藹然如桐鄉昨
朝事尋訪暑退窻戶涼子母立兩騎蹄鑿青瞳方禁酒
頗剛制雜以瓜葉香探囊倒竒作似覩星月光下言築
陂閣上言建男庠麻麥既幪幪禮義尤洋洋吾觀斯人

志豁達未易量念彼敦義塾峨冠講虞唐我老時所棄
採蘭祗自傷縹緲黃山雲雲出雨八荒明堂要梁棟矯
首無相忘

送李巨源幕賓二十五韻

仰嘯天地間長才不易得吾儒坐貧病把筆耕六籍舉
動見迂濶安能任繁劇蓮幕識李公如射已破的竒胸
浸冰雪威令轟霹靂當時雁鷺兒凜凜欲奪魄世道久
不古衆女嫉正色咄彼妖蠶精饒蠹天上月吳剛斫老

樹依然取澄徹至今郡治間棠陰偏愛惜借問新安儂
如何苦相憶閭閻萬山底土貧力耕織苛政常叫囂枯
魚釜中泣三年息胥徒荒村野寥聞狺狺山犬吠閉門
少踪跡樂育藹黌宮禮貌進逢掖賤子乏世姿斧斤赦
樗櫟駸蔑偶一言箭鋒喜相直繩床納晚颺竹下茶烟
濕公胡不少留六月行路熱蒼茫西江上荷花水晶域
曾聞鴻雁行一一馬眉白雞酒聚比鄰燈火勤趨席會
逢西風便大鵬簸羽翼別離畏知音碌碌門下客

贈葉壁山十八韻

余生甫四齡暴下如驚湍阿翁迎醫來命在生死關少
小不復識言之尚辛酸弱子復四歲如我病益艱僵卧
骨欲立憤憤忘晨餐葉君為調護再補脾力完稍稍雜
啼笑聰慧令人歡不虞朝雨作乃實衣裳單須臾面漆
黑倉皇起憂端多君投七劑神功使生還曾聞古扁鵲
飲水見肺肝察形與切脉不俟思慮間既具醫國手胡
為愛微官兩年坐學宮山深夜月寒臨岐何以贈愧乏

青琅玕

送鄒山長

精廬嘉樹合忻忻衆鳥鳴相過豈不好胡為千里行三
年振文鐸遺經寘滿籬婉婉媚學子隔竹聞書聲掃花
散幽策坐石移殘枰詩成似白雲亭亭峯巒生昔視秋
蛾飛今送春鴻征歸來憐兒女歡笑彩衣迎父老三
四人傾壺濁復清逍遙樵溪上於焉澹無營

和譚茶運浙東行韻兼寄周運判父子

妍醜施東西貧富阮南北人情劇夸毗古道寢傾側誰
能氣超羣可使舌擊賊平生好賢心遑遑求不得今年
見譚君似慰久相憶梗楠充明堂圭帛貢大國新詩肆
雄豪餘論多器識曾聞殿南荒計功先卜式邇來權茶
稅地高稱雄職身馳驛馬塵手倦鞭竿力深秋駕胥濤
飛颿破江色清風淪金芽便覺生羽翼能念顛崖人辛
苦愁堪織坐令雁鷺行胸中鏹荆棘天高日月明報政
無苛刻籍籍判運公十年少消息廉名糾百司盛德相

民極傳家白哲郎夔夔俱謹勅君飲潯陽酒我刈南山
穡相逢渺難期雨作雲塗墨

題陸孔昭菊逸齋

莽莽天地間萬物爭敷榮如何秋節至零落殊無情乃
知古達徒愛菊良匪輕柔條濯露潔嫩蕊含霜清淵明
棄彭澤屈原著騷經得非貞淑魂依依彼草木英陸子賈
好古高居澹無營培植亦已勤芳菲滿前楹花下時置
酒客來更共傾伊余糜斗粟觸目塵土嬰慙愧黃金花

獨以隱逸名終南有捷徑勿使猿鶴鳴

白雲集卷一

欽定四庫全書

白雲集卷二

明 唐桂芳 撰

七言古詩

代送王鵬舉之茅山

茅家兄弟坐三峯三峯偃蹇猶蛇龍
靈源泉香見客笑
丹光夜夜如金鎔分明英氣妙毓物
黃連蒼朮青重重
美石凝脂白欲墮腰圍虹玉才縱縱
故人今賦茅山去

作簿巖邑宜登庸返思宣城向戎幙我陪驄馬俄相逢
亂離萍梗得慰藉剪燭滿泛玻璃鍾後來筮仕各異縣
引領迢遞何由從龍鳳九年閏三月我臨千里當侯封
方期接手話鄉曲頓洗十年塵土胸胡為趣裝又慘別
老兵前導雕弓彤薇垣屹立秉清裁五色威鳳鳴嚙嚙
似聞嘉惠在湯沐豈比尋常稱句容君不見茅山之歌
歌未已郵亭歌盡君應起江湖秋水雁南飛為我音書
傳數紙

和李景暉上灘歌

昔我返擢兩浙間
盡日傲兀愁長灘
波懸石根各鬪險
驪龍夢愕探珠難
雷奔太空意凶凶
組貫雜佩聲潺潺
直疑深入水仙府
肌膚乍脫冰罽寒
我家溪濱號古歛
源流之玄溪曲折
每看老梢踏危椀
螻蟻排行猿過捷
有時倒似飲水熊
肩摩分寸爭奇雄
寸寸欲進退盈尺
自嗟辛苦筋力窮
兒伏斗心尤屈強
此身跣踣下復上
蒲帆獵獵候風信
風正南來轉東向
殺羊沽酒賽江神

洗足高歌謝惆悵君不見人鮓甕頭不忍聽亭名志喜
心始平是中豈無婁師德忠信可恃仍戰兢鈍如水馬
忙若箭遲速百年隨所見終期李郭坐舟中紫髯丹臉
許相同

題李榮卿瀟湘八景圖

老夫酷愛山水奇十年閉戶添白髭李侯何從購此本
紙面拂拭含清漪乃知鬼工鑿渾沌故設險阻東西陞
君山突兀高萬仞青草洞庭兩接之歌騷敬弔湘纍者

賈誼繼賦情尤悲客有劇談八景勝我言景勝端何為
山市晴嵐翠欲滴行人早發飯已炊泥深路滑行不得
鷓鴣眇眇啼雄雌蒼茫稍至漁村上日脚倒射光如篩
青天無垠水作界一株烏桕當踈籬幾迴鐘聲出煙寺
每被風約來遲遲焚香供佛上方事豈料夢破愁先隨
須臾平沙十數鴈整整祇為稻梁饑不獨江南羈旅恨
亦有人間兄弟思遠浦帆歸就昏黑傲兀喜脫風波危
灘頭解纜繫石角舟藏夜壑人未知尚憶瀟湘聽驟雨

斑斑染盡修篁枝南巡不返二妃從至今雲鎖認九疑
最是岳陽賒月朗洞賓邀我鶴背騎葫蘆細瀉銀汞走
上下一色同琉璃有時霏霏雪花集雪花席大慘粟肌冰澌
寒鱗價爛賤何用嫋嫋絲竿垂嗚呼亂離兵燹無圖本
誰能下筆追郭熙汪生摸搭入神品重樓曲檻相蔽虧
嗟予遐陬生局促空令想像神四馳還公此畫三太息
江長目斷心力疲

題程經歷紀異詩卷

堂堂六合久一家萬國幅員時所化奈何物衆生萌孽
龍虬起戮紛爭拏淮西軍來乙未歲和州殺人亂於麻
程氏父子當患難思之咄咄良可嗟小兒肩項俱被刺
大兒脇斷眼纈花解衣盤礴事鹵掠剪髮漆黑垂髮髻
惟餘翁媪匿舍後冷風淅淅吹蕪葭是時刁斗夜將半
兄持弟抱屯似蛙兄也求訣已入井弟也匍匐歸路賒
可憐翁媪縱獲免生兒如此憂未涯蒼黃不獨陳叔寶
亦有視死同泥沙須臾翁媪各返舍嶄然二子喜倍加

哀哉媳婦恥受辱淋漓血凝明丹霞長兒長媳今奄棄
設位祭酒雜果植嗚呼一門聚骨肉或生或死數豈差
幕賓敬甫人注仰美譽瑩潔玉不瑕仲庸劬書得奇語
直擬盤詰追聳牙有時上堂稱壽考後先袍笏衆口誇
起居夫人年六十康強端待孫扶車伊子丁酉避草莽
稚雛學字方塗鴉東西睽離苦絕食五日骨瘦窮槎枒
偶觀叙論重感慨鼻擁雙涕流橫斜

仁仲學正見子竹冠蓬髻形狀儂無異八十

許人因思東坡先生燒燈照影自為傳神予雖
不能是讀是詩者亦庶幾焉

春來多病患瘡痂跬步須論千萬里躑躅跚形也
儂如遇躡者婦啓齒竹冠野服髮垂耳手執枯藤坐復起
奈何冷眼程夫子謂予九九年差是君不見太公偶然
釣渭水曰載後車命之矣霜摧雪虐百草死檜栢叅天
翠如洗代間胡公百不理隣家得酒且歡喜

題方起莘五馬圖

徐君平生愛馬癖，造造畫手號無敵。百年物化形影存，
流落生綃總陳迹。今看五馬各異色，兩足驪黃一足白。
一足翠刷雲滿身，一足奔虹汗流血。奚官亦復可憐人，
笑挑青絲事羈勒。就中誰解驍騰姿，背立如龍俄八尺。
不蹠不啣有餘閒，回視神光恍相射。得非念同皂櫪悲，
御者非人常乏食。低頭帖耳或內傷，十二閑中推第一。
而今蹭蹬老可欺，空伴駑駘無賞識。嗚呼不幸世運遭，
難虞豈比唐朝太平日。牽來錦繡動成羣，玉鞍未卸黃

金勒丹墀晝靜柳陰移一點華飛墮香雪毛仲也是廝
養兒廝養兒嫁女傳宣出宮掖宮掖慣聽鼓節聲教舞
銜杯增戲劇酒狂大叫問梅花化作龔黃二千石

長句寄洪明善

鄙夫明年五十四洪君今年五十二我已白髮君醜顏
流落江湖兩兄弟當時好俠來姑蘇千金不惜酒滿壺
美人窈窕嬌欲滴畫舫如屋紅芙蓉後來再遊歎蕭瑟
虎丘空弔吳王石君試黃堂吏隱仙我作吳庠倦歸客

嗚呼契濶經幾秋，亂離未暇為家謀。杜陵亦生天寶後，
新詩句句干戈愁。朱老相見曾垂問，萬侯相別更惠訊。
書中密密千萬言，刺說生兒愈神駿。二弟館券能養親，
季也侍旁孝友真。一門安隱君食祿，况為幕府清風賓。
汪公文武雅好士，星斗聲名宇宙氣。守衛鄉邦十萬家，
一一遺毗知姓字。我今蹭蹬將奈何，門前春草落花多。
凌煙閣中好屍肉，分甘大醉當高歌。

鮑母江旌節歌

嗚呼棠川風俗美當時父子爭相死煌煌秉筆玉堂仙
曾為殷勤著青史孝子奕葉孫又孫如何篤行傳閨門
阿娘二八已擇對紉針補綴秋燈昏嗟嗟藁砧早不淑
瘦影零丁媚幽獨中郎有女續家聲伯道無兒延世祿
浚也眉目甚分明見客拜揖知姓名移桃接李乃猶子
嚼指動念如所生盛年耿耿冬復夏東家羅綺跨鞍馬
霜筠縱老節不枯夜夜孤眠淚盈把昨朝有使來京都
里間旌表大字書浚也起舞獻親壽冥冥不負操心初

只今亂離兵戈裏朝為秦兮暮為楚代間多少烈丈夫
不及孱然一婦女

同里吳仲機聚石族于憲外被之以菖蒲濯之
以漣漪而象諸山焉大夫士咸詠歌之珠玉盈
帙里人程仁表以仲機命來徵詩子養痾之日
已久愧筆硯荒落且聞西席鄭子明編詩甚精
於品鑑不知鄙作可以銓次否一笑一笑

溪南賓主皆好奇平生石癖人所知鞭笞無脛千里致

一旦位別分宗枝每疑鬼工鑿混沌混沌既破清濁離
高低起伏波浪勢無乃此山能似之何須扳援崑崙頂
何須陟降泰華陸分明六丁精猛力夜半奮擊千鈞鉞
只今蟠屈小窻外尚覺餘潤生鱗鬣良工未敢滿高價
盆池甃濯清漣漪衍者為巖缺為洞刺者為槩張為旗
璫瓏密伺乍掩映委曲暗想猶嶮巖金刀誰剪菡萏蕊
鐵網自罨珊瑚枝青青菖蒲已旖旎采采卷耳同葳蕤
天開晴雲走浩浩日暮暖翠收遲遲君不見藥城父子

百代師木假正以文字娛烏飛兔走幾朝夕英華消歇
良堪悲豈若吳君處幽閒冠帶濟濟哦書詩鄭郎編詩
繼騷雅牛馱馬載瓊琚詞便當乞我九節杖高秋曠露
珠纍纍眼明如月髮返黑黃石再有相逢期

題胡仲彞衝泥訪隱詩卷

春來幾曾見白日江水江花渺無極跳踉蛙黽也升堂
門外泥深將一尺胡公老邁志不羣要似東坡借木屐
可憐阡陌有東西欲往恐迷勤指畫恰如故步失邯鄲

足躡蹠勢逾迫時情平地產太行寸寸羊腸任盤辟
何當舍此趨康莊萬里迢迢一朝適胡公掉頭意不然
我向師山訪隱客師山先生中英讀書閉戶髮已白
功名懶作出山雲細數飛花點瑶席第想胡公一段奇
惜無畫史圖其迹狂風淅淅松樹間間有磊砢之怪石
掀髯獨立不受呼直怕蒼茫墮烏幘須臾風定神始閒
羽扇左持右挂笠羸得襄陽衆小兒爭唱銅鞮手齊拍
嗚呼鮑叔文章筆有神分明如畫能寫真相煩漉酒今

夜月便有山陰乘興人

東南山水瓌竒甲天下莫若天台匡廬三茅武
彞予嘗遊焉其以溫泉名者如三山之天湯句
曲之湯水又嘗游焉私怪句曲人頗以牲殺污
辱之三山置士卒鎬鑄雖不同句曲汚辱為王
公貴人禁不得一澡浴者黃山予鄉閭之名山
也距郡城百有餘里未嘗一即焉以遊癸卯九
月某日狂風怒號滕六大作予遊焉浴于池甌

蒸湯闕沸其氣如饋餽然內池限以石甃外池
瀕於溪流當水漲龍必潛泳易致湮塞蓋地產
丹砂故也與句曲三山特異雖知羣仙餉以瓊
琳玉樹珍禽縞鶴但恨諸峯巖岬千態萬狀不
能悉覩主其院者永傳性宗同遊者謝餘慶君
善序而詩之者唐某也

乾坤闔闢何邈綿陰陽二氣相熬煎悶靈毓秀朱砂泉
香柔清滑珠且圓我來欲浣塵俗緣垢膩淨盡瘍痲痊

是中疑有蛟龍眠九夏不竭流涓涓浮丘論道玄又玄
丹成一笑山花妍御風飛度天都顛俯視下界皆雲煙
或為鈴鐸車蓋懸為鸞為鵠時翱翔伍伍什什軍隊然
兜鍪出沒旗旄前或如豆兮或如籩侍者立者屹不偏
星羅碁布分市廛重重金闕浮金鈿瓊瓏刻畫如刀鐫
奮迅欲舉獨回旋崩摧不落誰挽牽良工難寫形蜿蜒
解衣盤礴鬱未宣幾回閣筆愁箋天神閒意足功始全
軒轅去矣數千年豈聞天上葬其仙空抱烏號涕泗漣

道旁荒塚枯藤纏新安大好輿籍傳往往異人多大賢
紫陽絕學先後先城陽問政差比肩孰若三十六峯聯
月明秋水開金蓮玄冥何事擅化權遽爾急雪當華筵
審知慰藉心拳拳白鶴屢舞交踟躕伊子短景箭括弦
休官勇撤廣文羶五百童兒采藥船吁嗟滄海成桑田

題呂德昭雞肋集

小年學詩雙髻丫每嗜險語同劉义邇來懶情謝鏹削
尚覺胸次饒槎枒呂郎本是後來秀筆勢老樹懸秋蛇

時時相過窺底裏曹丕奚翅十倍加偶然遠貶雞肋集
燈前摩挲眼纈花織紡青紅費機巧裁剪縝密無奇袞
又如赤子控生馬不使蹄啣駕鼓車我嘗擊節一再讀
誰謂詰屈猶聱牙呂郎落托頗差異舉俗媮耳喧琵琶
似聞譜系出左史螭頭曾立書黃麻殘膏臙馥九里潤
宜許文字專渠家明朝驅馳向翹館山中酒熱酸梨楂
團團巖桂月更好點綴金粟開奇葩儻逢故人詰新作
揚雄老矣傳侯芭

壽萬松軒

我嘗愛讀長淮謠又嘗愛讀廬山高千年宇宙清淑氣
散作二子秋霜毫先生本是神仙侶春風三醉瑤池桃
空洞可容十百輩果然眉骨非凡曹曾聞相國渡江左
馮夷夜恐收波濤巍巍被垣殿南服璀璨象緯常周遭
先生竭來蒞行院把筆按牘嗟形勞三軍助勦猛於虎
白晝濡沫民脂膏片言號令勝斧鉞不敢喘息矧肯啐
分明次第有賞格織文親賜金花袍公餘閉門謝私謁

卧聽饑馬翻空槽大篇短章出游戲如甕蠃緒無停縲
儒生往往盡畏縮筆削難假一字褒自慚鄙夫久彘落
吳霜亂點兩鬢毛每加溫溫座下坐烹煎未忍厭老饕
獻公以丹丘之雙鶴贈公以滄海之六鼈鼈以祝功名
之衮衮鶴以期壽考之滔滔今年寬恩弛酒禁何妨痛
飲芻香醪琵琶細細鳴嬌手明珠跳澗聲嘈嘈松軒納
涼曉無暑水盤湧出秋蒲萄

和吳生維新

老來嬾吐驚人語
水落寒天露沙渚
早年枉費餽釘功
謾把紅花媿青蕊
後山景慕雙井黃
平生袖有知見香
而今吾道付絃絕
可憐歲月空茫茫
庭前葉響雨三尺
枯樹瀟瀟含凍濕
忽傳新句滿蠻牋
使我起坐三太息
要知胸次空中樓
八風不破橫江秋
紛紛英雄起南北
每為咄咄生閒愁
昨夜如槃月未落
街頭美酒堪作樂
何須苦羨返舟人
如此敲門亦不惡

病中寄王鵬舉主簿

青山從事居南譙十年勇出當氛囂笑持六鏃關弓殄
攻城夜遁來報梟大旗短槊風蕭蕭於焉薦剡銓縣寮
嗚呼斯民燉然焦賴公撫治慰齷髻拔稂去莠如樹苗
康衢鱗次虹橫橋相將僂指四載遙薇垣賞格使乘輶
印綬纍若金懸腰每思祖澤未易徼三槐手植重生條
晉國魏國登前朝魏國既相勲業超聞望勃勃翻秋潮
天人責報何寥寥至今肉食分宗祧伊予潦倒不自聊
興修本欲甘簞瓢雲霾肯翳星月昭始謗終信鄭之僑

似聞兩廡公所劬錐石妥帖功匪窳灑掃未備網蟪蝓
闍人奔走藏山椒使我多病肌骨消援琴自奏閒中謠
黃君季倫下顧槐塘山中瀕行具述院判相公
天資高明識見超絕海內人士以之權衡輕重
子不可不往謁之明日入城府巧不相值歸而
沉痾又復踰月輒陳鄙句謹候闍人以獻

吾友黃君藝且顯十年不見心卷卷敝貂肯為故人憐
乘驟曉度虹貫天誓言圖本獻山川當時首義心益堅

明公磊落人中仙，燒燈辛苦窺陳編。棘闈文字世爭傳，
五十餘幅羅紋箋。毫端袞袞秋濤懸，題名雁塔理則然。
奈何世變桑海田，東南處處揮戈鋌。錢鏗失緒老狐禪，
殺儂白晝羊牛牽。明公神竿出萬全，愛護鄉里哀顛連。
勛勳無主誰周旋，北面徐偃玉几捐。覬覦竊日擅權，
沐浴請討敢盡宣。明公義激涕泗漣，委質便鼓秦淮船。
堂堂吳國能陶甄，橫來爵綬不次銓。金壺象筋當畫筵，
織紵兩兩龍蜿蜒。內廐賜馬銀鞍鞮，邇來又拜左轄賢。

聞有聲華徹日邊河嶽鍾秀星斗聯屢生異人宜九遷
鄙夫玩歲箭括弦可憐潦倒寒無氈土銜書永不炊煙
諸生每笑邊孝先窻前花落驚醉眠孰知未遇九方甄
使我多病常憂煎區區際會果有緣忍教雪夜扣空舷
至今目逆送飛鳶責沈因之矢長篇

家藏邊至愚秋江送別圖重遭兵燹圖已不存
尚遺丁先生長句一首時時展玩猶見畫也伯
文相公喜而和之區區不揆鄙薄輒酬雅意云

擢夫打鼓催發船我正踏歌開華筵可憐送別恰廿載
夢魂尚繞秋江邊擅場孰是文章手老丁拓落七十叟
平生無酒不吟詩得酒誦誦肯置口畫圖追想昔日酣
我髮安得青於藍海枯石爛世滋變粉墨蕭瑟猶楓杉
句中有眼曾飽叅而今遺恨令人銜蒼茫不記分袂處
撲面幾點蘆花雨沙頭招招頻喚渡大似百年割昏曙
薇垣高峻摩岡陵白登鬪格兵百層肯向松間訪蓬華
皎如六月懸壺氷堂堂吾道賴有此且對濁醪陶妙理

憂時每恨髀肉生拊已未應馬阜死十有二人常許俱
臣為臯契君無虞拂拭吳松一幅絹憑誰更貌歸來圖
題徐縣丞善政後

我來休陽才數日叟叟都頌徐侯德我問侯也果何如
龍鳳三年已在職是時丞相恢復初生民瘡痍地荆棘
侯也日夜費爬梳解鞍憇馬對山色公餘縫掖坐高堂
滿紙吟詩寫胸臆汗牛充棟書五車平生正賴稽古力
誰憐羣吏雁驚行不敢面謾敢貪墨昨朝大府砮城壕

意欲森羅固區域侯也布令咸爭趨浮筏源源江水塞
吾歛胡丞亦聯勲杜門饑餓常乏食每抗上官陳是非
旁觀凜凜為憂盡况侯本是同淮人清白一心未易得
權公文章天下奇藻鑑妍媸誇正直何由善政傳無窮
竹帛易糜石不泐清朝儻遇使觀風顯而用之衆所式
河朔侯公君祥知縣之四年公憐其訟簡民
淳民亦樂公之德也歲次辛丑春予入其境則
耕鑿無廢壤蠶桑無落職歛休寧兩縣流離轉

徒且僦居以就食子未嘗不慨歎人人如公用心其有不治得乎憲前置石璣瓏刻畫象天都三十有六峯為賦之以昭善治云

侯公治邑如治家山深俗美靜不譁公來撚指已四載滿眼種就河陽花當今理民盡魚肉稍稍推剝多怨嗟豈比桃源是樂土三竿紅日未坐衙窻前有石大於敵璣瓏遠邇分畝斜訝然欲張蒸紫霧突矣乍破明丹霞得非天邊之五老無乃江上之九華螭蜿磅礴鍾異氣

融結秀麗森羣葩浮丘飛仙自芝朮王母醉宴誰棗瓜
老生正在黃山下朝夕與山對槎枒自從亂離走闌闌
兩鬢安得翻烏鴉而今默數甚歷歷高低次第了不差
常思比來峯勢斷補以六六疑女媧可憐四海尚鼎沸
東風浩浩吹塵沙他時公肯訪真隱松根汲泉飯胡麻

開歲十五日訪楊鑑泉

鄙夫病酒渴吞海不管流年雙鬢改春來偶爾訪君家
山氣增寒雪猶在低垂茅屋刀剪齊小竹蕭疎梅蓓蕾

清泉一竅環佩鳴雜以亂石多磊磊若人胸次天機深
奔走江湖今幾載劃然舉筆漲雲煙物敢逃形如有待
掄才端的能擅場價重千金珠百琲伊子夙昔話心期
老硯不靈用饑餒何由卜築東西頭釣水有魚薪可採
未許天台謫鄭虔定說燕臺徵郭隗手攜短幅歸去來
夜夜斗牛發光采

留別江伯仁

當年三茅曾一到羣仙謂子精神好首戴三寸鹿胎冠

骨聳眉稜許學道後來奔走向南臺諫議相知頗同調
改製冠削斑竹皮并把生綃寫容貌而今汨沒塵土中
欲效南山隱霧豹空餘兩鬢點吳霜甚矣無成總昏耄
今年喜登東臯樓百尺崢嶸接窮昊五更雨氣足清涼
十里嵐光媚吟眺紫金霽雪聲蕭騷白石晴雲勢騰趯
豈無洪扣鐘遞鳴况有練溪月可釣側聞大父人中英
鑿沼梯山擬天造嬌花新移剪錦竒美石舁來雕玉巧
珊瑚倒影浸碧波犧象香浮出清廟嗟吾異世雖後生

念子同袍果夙好講明暨假席坐溫歸去寧忘國知報
屢煩設醴環翠軒折草抽莖結烏帽服之不稱老奈何
摧頽敢對菱花照臨岐且賦長短行鸞鳳孫登作清嘯

題烈婦吳氏

吳家有女踰十五嫁得王綱作烈婦兩小無嫌意態嬌
髮結青絲表情素劬勸淮西起戰氛白日殺人任喜怒
含山縣小勢難支信宿梅山隱秋霧婉也勤事舅與姑
綱也十步一回顧如何艱險各駿奔舅姑不來夫亦去

形單影隻逐強梁手足胼胝困中路寸心脉脉誰得知
箋愁欲向天公訴天公杳冥耳不聰骨肉睽離恐孤負
舅姑豈是鍾愛疏良人豈是佳期誤萍蓬難保此身存
恨不待年已婚娶徘徊浦溆托波神憔悴湘纍同所苦
饒蛟嚼齧魚為棺誓肯堅貞遭穢汙短戈接引爾何癡
血浪翻河衆驚譁嗚呼儻明生死識重輕百歲光陰等
朝露下堂避火失待符安得芳名刊典故紛紛駐馬再
拜徒敬弔香魂水仙墓

題村田樂圖

人言農家苦我言農家樂
春田雨如膏呼兒具錢鎛
牛疲卧樹根氣喘嚙枯籜
老妻餉午炊隨分飽藜藿
秋高穀登場萬寶光錯落
回頭念躬耕此計良不惡
嗚呼仕途豈似歸田好
骨肉睽離不相保
半生鬱鬱利名愁
一夜白髮驚霜草
宦游安得比兩翁
山簫村釀肩相從
手持鼗鼓聲藜藜
何異擊壤歌
堯風崇安學
官性嗜酒返關
兀坐無酒友
只使獨醒看
畫圖
隔林幽鳥聞
提壺

題蔣震夫竹窻詩卷

世人愛竹有何好箋詩綠竹本二草建溪搗紙女兒膚
拂拭先生照晴昊孰似蔣家三逕中稚子蘄然脫錦祿
自從尺寸長凌雲修幹脩脩青未了秋華結實飽鳳雛
等閒肯著安巢鳥先生世隱天都峯種竹窻前搖翠葆
涼風起處繁聲生夕陽落後清陰窈窕遙手把太玄經
賦性平生厭機巧苔封空山白石床只許羣仙來問道
十年奔走京國塵萬事莫如歸計早挂冠奚必神武門

紫芝采采商山老我今便約竹林遊拄杖隨身恣幽討
丹池無滓香且甘釀酒百壺從醉倒

暑中有懷叔固時留武林

暑氣蒸人欲大叫四壁何曾通一竅盡日竟無故人來
欲雨但聞天女笑蒲葵脫腕胡可停蠅蚋啞肌誰所名
安得杭州買官冰涼卧西湖湖上棹

代送貢友瞻幃詩

宛陵南湖鬱相扶山如走馬水直趨菰蒲兩岸瀦萬頃

集有鴻雁跳有魚聞君卜築歷幾世遂以姓顯稱楚吳
白頭學士文章伯日日待詔承明廬仰觀清光才咫尺
殿頭催賜春滿壺謝庭玉樹照耳目一一捷足功名途
情知鳳雛出丹穴毛質自與凡禽殊鵠來司會紫陽里
朝坐學舍夜讀書秋徵倉廩如斗大米粒愛護明月珠
錙銖累積肯糜費共喜買田割膏腴三年細滿返故里
舊栽楊柳今扶踈上堂父母問起居下堂兄弟盡友于
一門被服青與紫我詩宜繪家慶圖

代送汪彥文幃語

新安本是神明鄉
黃山萬仞摩天蒼
溪流淺碧魚可數
巨石聳屨橫為梁
紙光漆液硯比玉
春風吹出金芽香
曾聞廟食封忠烈
千年英氣懸秋月
又聞詞翰屬龍溪
半夜校書照青藜
遙遙華胥譜牒知
君雲仍是幾葉
於焉婉孌琴堂中
意氣凜凜多高風
願如黃鵠奮千里
不比燕雀棲蒿蓬

夫君早歲遊采石
醉吸玻璃弄明月
有時單舸訪謫仙

青山無言怒濤發蛟龍捷出如人長悲風蕭蕭吹短髮
賢明賈侯欣識之胸中抱負如此竒金科玉律亦爛熟
毫端烟雨常淋漓嗟哉巡吏蠹蝨小有才磊砢不一施
謁來喬遷紫陽里白雲古縣風俗美幾回封印待長官
瘦馬凌兢踏寒雨而翁積德在後人諸弟俊氣鬱眉宇
只今翁調向東陽令弟薦剡飛秋霜文也細滿膺府檄
聲華千里相輝光共說汪家兄弟好明年榮書上上考
筮本可為祖母病行禱婺源中途五鶴導舞默

有懸應歌以送之

春來曾無頃刻晴十日九日常風雨鄙夫更為感時憂
浙東賊勢猛如虎官軍道上恣搶攘居人遑遑盡閉戶
笈君躡屨旬容來兩足踣跚困泥土自言三歲乳下兒
丁運艱難失恃怙白頭重親八表餘弗忍遺孤重摩拊
陳情之表先我心似訴悽然無盡苦奈何垂老卧沈綿
不及慈烏能返哺人生至孝達神明敢以身代期疾愈
五王聯翩龍袞卷洋洋在上誰敢侮清香一瓣妙感通

祥飈恍若神君語發源尚隔五嶺遙白鶴便向尊前舞
歸來喜氣溢里閭鼉鼓聲喧作端午茅山之石規玉杯
茅山之木釀玉醕茅家兄弟把靈芝壽彼高堂太祖母

嚴陵錢君瑞醉中索題環秀樓詩

何當攜眼翫環碧十二烟螺浮几席主翁讀書樓上頭
半捲疎簾銜曉日清光散入骨髓寒翠影長凝鬢毛濕
幾回挂笏度閒雲一鳥不鳴春寂寂

走筆戲贈張文鼎墨梅

梅花不是人間白畫工
休污瓊粉色淡墨踈踈淺著烟
一枝蘸出臨溪月張君好畫本
詩人吟魂寫影俱逼真
從此玉妃歸不得滿紙占斷羅浮雲

題王仲寬唐馬圖

漁陽風塵吹不起驂騮卸鞍洗秋水
奚官新絡青絲韉
不嘶不齧意千里玉花散作遍身雲
鐵蹄欲凍六月冰
代間龍種豈易得合與八駿爭
驍騰君不見幾年蹭蹬
鹽車下未售黃金滿高價相逢儻受伯樂知
何用區區

說圖畫

題王鵬舉漕米詩卷

君不見當年婺女米船來霞紅雪白山作堆杖頭三錢
博一斗家家鼓腹收饑雷而今離亂與昔異新安反擢
麥舟去概平斟滿曝日乾妻兒未許食新味我邑隘小
曾不知科需百出民力疲躍冶鑄殘農器鐵美箭伐盡
柯亭枝吳蠶未吐銀絲濕府帖又催夏稅急桐子乍大
漆液黏吏胥敲門雁行立人人都說少府賢訟庭不忍

施蒲鞭今年漕麥更運米寬期集事咸歸田雄村觀口
秋水漲江桅街尾相次上幾回買魚祭江神願乞順流
風力壯白頭四皓勤索歌願言甲兵洗天河東隣酒好
且賒吃我歌才薄奈爾何

九月十日命次兒文鳳攜琴謁張仲賢知縣是
晚宿澄塘蘭若同吳德因文鳳聯句以叙陽關
別意云

丈夫不作兒女淚獨立荒郊望秋樹今晨抱琴謁侯門

一曲宮商美無度離鸞別鶴遇知音流水高山得真趣
老僧香焚螺甲烟小童茶瀹龍團味石蒲含雨漾寒波
徑竹迎風滴晴翠詩成稽首西方仙老去逃名禿長孺
堂前桂吐月中花溪上人呼烟際渡幽亭一箇剪茆茨
淨渚數層集鷗鷺次公無酒狂殺狂巢父掉頭去復去
攀轅截鐙苦留連對月臨風莽回互布帆百折轉清江
蘆雁數聲隔濃霧鳳凰臺上帝王居虎豹關中英傑聚
紫薇露濕宮衣香紅藥風微省郎署張公豈獨上諫章

憂國終當減租賦行年六十老弟昆此日尋常愧師傅
魚書一紙報平安慰我交情發深喟

題李近仁太守夷山圖

靈山本無山夷山石作骨嶙峋巖巖幾千層太行之石
高於屋碣石入海空沈淪漢家寶鼎出河汾至今瑞氣
不肯散夜夜上天生白雲賢侯仕宦思故里江北江南
幾山水直把蒼松銘寸心萬歲山前聽秋雨四海車馬
將會同歸來未効柴桑翁分明衣冠李太白落月屋梁

見顏色要使吾儕拜畫圖英風絕俗人間無

題趙仲簡黃山送別圖

好山似高人招呼不可致如何六六峯蟠屈畫圖裏自言東書巢浮丘瘦藤老樹猿啾啾懸巖瀑布飛百尺水精為簾月為鈎有時樂奏鈞天表羣仙小戲乘蒼虬只今風塵舊夢斷每懷蒼壁祇自羞豈如塗抹鴛溪絹朝夕展玩消閒愁畫中送行客烟烟神光浮烏紗白紵勢落魄罄折莫是胡生不後來差似程叅軍意氣矯矯超

凡流更有兩士亦修整回頭飽挹黃山秋恨不并寫鄭
處士蒲鞵騎牛穩如舟嗚呼新安好景名天下晴嵐萬
狀山無罅趙郎休用賦驪駒醉讀吾詩能當畫

贈番陽沈晉可

江南五月梅潦流閉門吟作喚雨鳩有客短襦泥沒脛
破紗漏髮寒颼颼恍疑折角巾又似白接羅何須驚駭
陳梁市便許笑倒襄陽兒君言少小走四海雷轉空腸
氣不餒遑遑逆旅無知音每欲箋詩訴真宰兩年抱琴

黃鶴樓三年作賦鸚鵡洲眼光艷艷銀槃月筆陣灑灑
冰壺秋夜來佩劍劍花吼解后筠軒一攜手狂歌自喜小
天地歷譚不覺飛星斗解君頭上巾漉我甕中春牛馬
恁走江湖客麒麟肯畫山林人

近聞叔器學正遷善府掾俱有海北喬遷喜而
不寐為賦長短句二十一韻

姚君作詩似建水朱君飲酒如淋灰自我得二士壯氣
傾九垓鳳窠丹穴豈凡鳥馬育月窟真龍媒叔也讀書

漁梁上閉門不出旁人猜闌干醉拍山月影呼我賸
酌黃金壘三年校官留錢塘倏見傑閣飛雀鬼去年又
調池陽遊繞屋芙蓉秋水開米圓如珠鱠如玉槐陰立
馬荒蒼苔遷也亦復可憐人遑遑奔走於塵埃作賦直
過鸚鵡洲抱琴又登鳳凰臺舍儒就吏營斗祿慈親鶴
髮將鬢耄有時拔劍頓足舞仰天大笑何詎諧當今天
網下罩士喜聞霜臺重薦才官河五月鼓聲集剌剌黃
旗插高梳廣南雨洗息歆瘴海康雲霽收狂雷政須詩

書佐元帥不用矛槊殲渠魁金刀實布巖洞俗椎髻黑
齒獠蠻孩同里已盟膠漆久同道又聯雁鴛來審知公
餘了無事檳榔茶熟椰子杯蹇予布衣誰比數長大漸
茁鬚滿顯嶺頭儻遇南來使一枝為寄先春梅


題雪谷詩卷

雪谷二字乃雪菴為恒陽王作廉
侯子有立以餉予予轉貽允中姚

師

鄙夫早遊廉侯家廉侯諸郎蘭茁芽厯談鼻祖事聖主
乾坤開闢歸中華當時皇朝漸寧謐人才密擲俱寵嘉

雪菴釋子應明詔纍纍作字如畫沙玉堂天上風日軟
研磨老硯浮墨花乘閒疾掃兩大字筆勢袞袞懸秋蛇
第思冀北風雪冷馬毛蝟縮人盤蝸得非念佛雪嶺遠
瓊花世界爭槎枒諸郎貽贈今幾歲玩之歛衽重歎嗟
不如寄與姚道士萬山深處巢烟霞蕭然一室水晶域
焚香了了消俗譁只今六月若坐甌安能飛度乘仙槎
清冷恍踏層冰上請師為試先春茶



白雲集卷二

欽定四庫全書

集部

白雲集卷

三

詳校官中書臣徐志晉

中書臣劉源溥覆勘

總校官進士臣楊懋珩

校對官助教臣胡子襄

謄錄監生臣崔堂

欽定四庫全書

白雲集卷三

明 唐桂芳 撰

五言律

追賦鮑元茂南墅

南州盡烽火南墅尚亭臺
野水隨田合山雲破石開
乾坤雙轉轂歲月一深杯
俛仰渾如昨無由化鶴來

又

園林欣有主文字見諸孫南斗低窺座西山直入門卜
鄰期歲晚屏跡遠人喧安得扶藜杖看雲坐石垣

雨中有懷王達善胡子嘉舒仲灼趙伯庸暨張

觀海楊玄同二高士

相逢何草草相別太匆匆世路東西異羈懷彼此同才
推三語掾字學九成宮今夜鍾山雨還聽靜打蓬

又

客路經千里穿山勢萬層年華吾潦倒才俊爾騫騰泥

滑妨行李雲深問老僧
荒村猶未到細雨濕孤燈

又

二子才華俊郎君意氣多
相期青史傳休賦紫芝歌
野鶴翔雲漢山猿嘯薜蘿
物情多自得吾道轉蹉跎

又

每憶黃冠侶相逢白下時
竹牀丸宿藥松嶼拾殘棋
客路從澆俗仙家悟化期
今年授衣節搖蕩菊花枝

除夕

金史曰... 卷三
肯為橫青眼空嗟出白髭時光渾似舊世態竟如斯繼
述慚先志攜持念小兒嶺梅消息早開到向南枝

偶題示虎鳳二稚

作客三千里明年六十翁傳家無長物到老得詩窮種
杏添新蕊移松長舊叢閒中叅妙理一一領春風

有懷胡子微時謫和州

遠謫和陽道而今兩歲期病身惟有骨髡首尚留鬢老
母無能養嬌兒不解悲平生二三友惆悵立多時

黔縣道中

如此古黔縣，淒涼未易陳。
萬山惟聽雨，半日不逢人。
虎嘯偏愁客，花香欲醉春。
明朝各分袂，灘險石磷磷。

留別程舜卿諸公

送客短長亭，驪駒那忍聽。
時光雙鬢白，吾道一羶青。
落日心還壯，微風酒易醒。
揚雄空老去，誰授太玄經。

送權生丙童遊金陵

槐堂丞相里，今日汝來遊。
莫怪傳經嬾，翻憐老病休。
潮

生聲入夜雁落影橫秋儻有東歸使音書肯寄不
汝叔相知晚俄逢練水濱筆鋒雲作使談麈玉為人北
關聲華遠東曹事業新老生甘瓠落多病鬢如銀

過太湖

小舟如一葉風順亦悠哉浪撼山疑動雲移樹欲來薦
賢容有道遺逸愧非才莫惹懷鄉恨臨風進一杯

又

向晚推篷望羣山隱約青篙工排蝻勢野飭雜魚腥水

濶疑無地天低剩見星吳音相爾汝聊復慰飄零

七月望日與龍翔付知命謁了即休上人因登

金山絕頂見真楊瓜州鎮江江陰諸山戢戢如指

獨立金鰲背乾坤浩蕩間遠吞四海水低壓五州山說
法驪龍聽忘機鷗鳥閒乘槎如可問吾欲款仙關

送楊曾之浙東

佳麗金陵地蕭然爾獨居門無私客謁座有諫官書清
切登臺久光華入幙初浙東勞遠役民瘼問何如

又

自喜江湖上相交氣槩中名郎新奉檄爾父舊乘驄
驛館三秋雨官船萬里風定知重見日爛醉菊花叢

過楊子江和王酒仙韻

平生稱壯觀今夜共危船海內無雙士江心第一泉
星離光尚濕月轉暈方圓浩矣詩成癖飄然意欲仙

過旌德縣

路入旌川境晴光潑眼明攢峯渾欲語幽草不知名老

屋僧留話荒原人獨耕
慙成晚宿野餘石泉清

度新嶺

迢迢設險阻寸寸倦躋攀
不到廬山險那知蜀道難
嬌花迎客笑幽鳥怪人看
却憶幽棲地當年詠考槃

立春和李白春日韻

倚杖喜逢春鶯遷可喚羣
已更新國主誰識舊將軍
塞北山凝雪江東日擁雲
無才甘瓠落肯作劇秦文

曉行

旅泊三千里思親十二時衝雲尋路險帶月出山遲鳥
語頻攄臆花看自美姿無人知此意小立為題詩

種松鑿沼見梅大兄有詩相賀次韻奉謝

悟得浮生理脩然懶是真移松延宿鶴減飯及修鱗父
子長相別詩書不救貧殊方喜安穩消息近來頻

用石門宴集韻有懷王達善

青春千里道白髮百年心有約居茅屋無由會竹林艱
難掛寶劔憔悴鑄黃金自失相知友何煩費苦吟

示文虎

平生苦詩癖為撚數莖髭有客尋安道無人說項斯
哺烏懷汝母舐犢愛吾兒東海珊瑚樹今看第五枝

送趙按察使

人才產吳楚吏術見蕭曹肯厭驅馳倦應誇贊畫勞
秋霜飛健筆夜雨濕征袍回首金陵道春光醉碧桃

除夕謝鮑尚聚遣貺

人事匆匆度流年疊疊增江山雙蠟屐天地一書燈身

老甘貧賤居閒謝愛憎猶煩故人意餽醕愧無能

又

鳳闕人才少雞林道價增自憐徒刻楮誰肯為傳燈白
鶴無心夢青蠅有賦憎平生二三子羨爾屬多能

和子野妹韻

老病緣吾在音書到汝邊人情悲昨日吾道厄殘年
露三更鶴嘶風八月蟬白頭吟思減短澁不成篇

又

近得琵琶使新詩手自開汪洋桃葉渡搖蕩菊花杯
歲月兵常滿乾坤老不才病來消瘦盡心死著寒灰

又

目斷三千里心懷十二時流年空冉冉去國太遲遲白
日妖星現青天淚雨垂檀公六六策到老不能施

懷鮮于必仁

簪纓舊卿相翰墨小神仙足迹半天下心懷太古前仲
連將蹈海元亮未歸田猶憶兒童歲攀華醉管絃

又

詩酒狂猶在情懷晚更真聞聲還似舊顧影已無隣
白鶴能超俗蒼松不受塵五湖煙浪濶未許老鱸尊

又

六十摧頹甚相逢少故人死生頻
儂指離亂暗傷神經術幾無補才華果絕倫
晚來揮翰處墨染筆花春

又

月皎俄如晝山涼總是秋唐衢雖善哭宋玉只供愁
薄

俗無青眼流年已白頭
蕭條昧生理一恁拙於鳩

述懷

耕鑿吾逃世文章誰薦賢
艱難添白髮留滯隔青天
雨暖花迷蝶溪清柳貫鮮
閩南米價賤滿擬放江船

又

浙右方虞盜朝端正渴賢
鼓金聲震地旌節影連天
戰北多人醞時危乏海鮮
將軍聞號令警急要戈船

喜雨

畎畝冬將盡屯膏兩月過
焦心愁太甚到耳喜偏多
占畢言猶在為霖事若何
草堂無客到不覺自長歌

送族侄李士宜歸嚴田二解

栽松結茆屋屋小客頻來
白髮愁邊改黃花亂後開
江山雙破屐宇宙一深杯
偶讀思亭記令人淚滿腮

又

老去思鄉里何時拜墓田
山深雲氣走水落石頭圓
異世慙先德同宗覺汝賢
好將蘇氏譜一一向人傳

長兒文虎次兒文鳳送士宜詩附錄于此

吾宗好兄弟亂後喜身存未辨親疎義重將譜牒論猗
蘭雖奕葉仙李本同根富貴還鄉里文章表墓門

右文虎

吾宗自李出今各天一方遭此亂離世艱阻道路長音
問咸不及焉知存與亡今晨喜有客鬚黑雙瞳光手持
舊譜牒重上高高堂拜吾父涕泗沾衣裳我亦互
拜跪乃是鴻雁行連宵語親族風雨還對床山深秋露

早衣單怯微涼明朝別我去離亭霜葉黃相送未忍別
徘徊望斷腸

右文鳳

用陳敬所韻奉簡董仲潛

佯狂董隱士學道本高流倦踏燕山月歸尋練水秋金
丹爐裏伏箒笠畫中求末俗無人識從教衆口咻

又

求仙登上界喝佛遍叢林座上逡巡酒窩中快活吟曾

傳丹化米政用鐵成金卜築南山道都忘出處心

送從子之江西

放棹三江口辭家五嶺東殘年千里別何日一尊同出
處心須小文章氣尚雄白頭慈母在行色莫匆匆

又

猶憶兒童日攤書爾獨能翻憐雙白鬢空負一青燈對
酒他鄉客將詩何處僧別離今老大風雨暗溪藤

又

汝壯身須遠吾衰意轉迷一門半生死諸姪又東西孺
子亭前坐滕王閣上題大江波浩蕩廬阜與天齊

和李太守感懷韻二首

作郡一千日憂民十二時抱琴歸亦好露冕出偏宜志
氣風雲會襟懷冰雪期文章賢太守光采照南離

病起南樓日雲隨雨到時擁表眠未穩沽酒醉相宜采
菊陶元亮焦桐鍾子期相看增意氣那忍暫分離

七言律詩

懷先人

嚴親八袞鬢毛垂
治世何曾識亂離
身後尚存三尺墓
集中空見百篇詩
綠筠軒小花為褥
白石階平槿作籬
欲往城南渺何許
幾回長費夢魂思

忽憶先人涕泗垂
百年骨肉半分離
恐逢今日干戈起
幸抱平生篋笥詩
地僻雲埋松下石
日斜水護竹邊籬
痴兒未遂光揚志
何以終身表孝思

謝仁仲見貽佳什

可憐卧病一春餘，何異浮雲點太虛。次第當虞丹鼎熟，尋常錯把酒杯踈。階無繫馬應遭罵，家有籠鸞為換書。斑竹近生無數笋，傍人疑是子猷居。

和程生克有弄璋之慶

念汝相從昔未婚，掌珠今見浴金盆。欲知江左多文獻，定許河南兩狀元。潑潑鯉魚供美饌，修修鸞鷲映華軒。太公七袞俱強健，喜弄樽前四世孫。

奉仲脩同知

病夫悵望楚天低一箇文星夜向西花自上林曾遍賞
鳳經阿閣欲深棲百壺官酒心嘗醉五色蠻牋手自題
老大品量吾豈敢當年李杜許名齊

又

剔盡韓檠二尺低應知家學出關西荒村月苦人將靜
老樹霜寒鶴未棲文字已傳千里遠姓名方自九天題
維舟早晚鄱陽郡湖水初生柳葉齊

白頭杜老遭離亂幾度移家住灤西自喜文章稱怪怪

誰憐踪跡返栖栖
袖長肯向筵前舞
橘熟應須霜後題
見說省中多暇日
一簾紅藥雨聲齊

送伯剛歸星源兼簡吳用賓洪明善

王化當今自南北
人才平世恁東西
飛揚士卒轅門衛
號令將軍虎帳棲
道路傳書新羽檄
家鄉華屋舊棖題
幕中二妙如相問
莫說雄談可下齊

寄題心遠樓

見說楊家新締構
數重茅屋出林標
情懷不是乖時世

踪跡多應避俗囂雲盡天邊山擁市雪殘溪上水平橋
折腰懶似陶彭澤酒熟松花香滿瓢

和程仲庸游京口留別

我正無心懶似雲那堪奔走污緇塵飛花岸柳偏愁客
吹浪江豚忽拜人玉帶暫拋煩轉語楞伽曾寫悟前身
異時好說金山寺小小漁舟喚渡頻

單樂山有船到灘頭翻白浪之句景暉足成唐

律一解某亦僭和

溪行何異入閩中，卧看青山重復重。
船到灘頭翻白浪，橋橫渡口架蒼松。
鄉心暗逐雲千里，客夢頻敲雨一篷。
無復承平舊風景，年年相憶采芙蓉。

和褚嶺

啁晰幽禽喚曉晴，路人遙指跨驄行。
未離建業秋霜肅，才到徽山瘴雨清。
十里豪吟猿鳥怪，半天悲嘯鬼神驚。
老夫昔忝烏臺薦，多病名辭一紙輕。

送鄭士恒往江西

洪都昔號殿西土畫省新開列上台鄭老每從工部飲
烏公何待石生媒斷雲將雨侵書幌明月隨風落酒杯
山獠洞庭皆入貢海船日日候潮來

聞雪中仲修諸公謁國良大尹時余有海寧之
役不偕茲會明日彥冲下訪始知其故再用奉
仲修西字韻以發一笑

雪兆豐年酒價低也應乘興過橋西風拋亂絮迷行跡
烏擇危稍認故棲撲面營營供客賞穿窻故故索人題

天妃果是栽花手開遍園林頃刻齊

老來合眼夢鄉里百尺浮圖傍水西宇宙何時無戰伐
江湖到處有羈棲不嫌麋鹿添深跡祇恐芭蕉失舊題
皓首歸歟理荒穢一畦春韭斬新齊

送權伯文劉仲脩二公赴金陵

垂楊不管人攀折日日河邊別恨傾馬上雲移紈扇影
樓頭風約玉簫聲洛陽雅負經綸志番水終歸雉堞城
况復官聯舊青瑣五更月白御街行

今年未聽黃梅雨水落橋頭一丈深每賴諸公相慰藉
恐遺一老恣沈吟神光易動豐城劍古調難追綠綺琴
剩欲東門圖醉別近來官酒貴如金

病中辱周彥明吳彥冲下顧荒寂長篇短句間
見層出嬾拙不即奉答姑述唐律十解以謝

誰覓家居大小溪溪頭樹影可齊齊清秋曬柿皴皮熟
白日懸猿背面啼遠客醉歸愁險路病翁嬾出怯深泥
夜來南斗覘竒氣怪底文星獨向西

先生何事困山囚，澣統于今盡建侯。
石骨有稜宜礙路，溪流無罅却通舟。
綠荷傾蓋二三尺，紅槿開花千百頭。
慙愧陳琳草檄手，才疎意嬾更悠悠。

梧桐將雨薦新涼，爛熳攬槍夜放光。
憫晉疇羸惟有骨，醫秦狂暴却無方。
粟里可憐非隱所，桃源畢竟是仙鄉。
摩挲病眼關山隔，老滴西風淚數行。

先子平生篤愛真，時兒聰慧每誇人。
孝揚未盡三牲養，翰墨猶存百世珍。
夜夢音容偏恍惚，每懷恩德倍酸辛。

回頭豚犬催吾老但願無忘骨肉親

造楮山翁操國柄一時物價赴低昂
漁梁水落青螺出鳥道天晴白果香
悞喜病懷相唯諾空遺老筆擅文章
平生周子通家契昨拜兄瑩涕泗滂

和程仲仁

水落山溪路可通惜無佳客為談空
氣吞湖海文尤壯胃滿乾坤道不窮
家少黃金單嗜酒愁添白髮欲成翁
水壺凍損寒梅蕊自向茅簷待日烘

平生愛慕程文學一見渾如骨肉親
僑寓厭聽蘆葉雨故鄉未老蕨芽春
騷壇高築成勅敵佛屋相依結近鄰
大小溪頭田百頃山雞野鴨未為貧

寄題溪山一覽亭

杜陵一覽衆山小好事元戎況有亭
紅樹深明朝雨暗白鷗飛盡晚烟青
關河表裏連城郭日月東西繞戶庭
眼力欲窮千里外動人霜角酒初醒

山聳牛頭來北極水分鴈爪向西傾
曾無障礙雲填道

每有光輝月滿城十萬貔貅歸號令三千熊虎佐威聲
何如攜取謝安妓笑拍闌干岸幘輕

賀程用中弄璋

丞相單傳知府裔而今厚澤見聞孫清風黃閣三台貴
皂蓋朱旂五馬尊利市乍頒聯玉果爛斑初試出金盆
分明頭角真英物擬待槐邊恣討論

病中次韻有懷伯文

聯翩接踵向金陵對酒悲歌不忍傾梅雨和煙成暝色

荷風雜水作秋聲
鳳凰無復吹簫地
龍虎空存辱井城
試問長安天遠近
舉頭但見日邊行

愁心却似滄溟水
流遍東南日夜深
好客俱登青瑣闥
老夫只誦白頭吟
龍潭雨足須乘舫
鹿苑風清或抱琴
光景不殊人世換
幾家隔岸柳搖金

次韻奉會鮑尚裝

病起凌兢似鶴形
可憐對酒不能傾
歌殘易水非燕計
讀盡離騷是楚聲
雲閣林陰迷別塢
雨拖野色入空城

猶思康健顏如玉飽飭無憂躑躅行

四用韻奉謝鮑尚聚新詩之辱

病中不悟死還生起對妻兒淚眼傾竹月當窻如汞走
松風落礪似洪聲夢尋故友多迷路愁認鄉關只隔城
何似遙來棠樾里一雙文鹿駕車行

七用韻奉寄程仲庸

河南譜系唐昌簿一見軒然意氣傾近喜諸公文薦剡
每傳多士讓詩聲相思幾度長懸榻報謁終年罕出城

只有鄭虔最知己
巷南巷北日同行

八次韻奉簡鄭士行

尚說故鄉淮甸好
雄談滿座建瓴傾
侵晨放鶴摩霄影
半夜歸船逆水聲
和洽恍同躋壽域
太平何待築長城
而今破帽秋風客
嬾逐雕鞍唱道行

送嬾雲真士歸龍虎山兼寄觀海內史

曾聞龍虎神仙宅
合作江南第一山
已解玄關參奧妙
更求師法砭愚頑
抄方每跨青牛出
賣藥時隨白鹿還

想得故園重九近西風滿把菊花斑

半年不飲渴生吻幾日無詩愁滿胃客裏都忘廣信路
夢中如聽貴溪鍾仙機有女和雲織野碓無人帶雨春
從此別離千里外將書何處覓行踪

賀姚叔器卜築溪南

猶憶石梁最佳處夜深月影轉闌干昆明已付劫灰冷
茅屋不禁風雨寒剩喜攜持同稚子未妨談笑共儒官
何時好辦青簑笠擬向溪南把釣竿

和山行訪隱

秋宵苦短夢歸遙
應負淮南賦
隱招笠澤魚肥無縮項
吳江米熟有長腰
人情多幻成豺虎
天運相驅轉汐潮
贏得山行幽興好
樹陰陰下小溪橋

載賡遊武夷韻

閩海人烟接島夷
仙家元在畫橋西
春風酒熟三姑市
夜雨茶香九曲溪
古洞設關閒鐵鎖
懸崖鑿室上雲梯
神呵鬼護龍蛇字
他日重來覓舊題

大隱屏前疊翠岑，斷腸忽聽白猿吟。
讀書爐畔殘煨火，講易堂中舊盞罇。
隔水幽華紅步障，穿松小鳥綠衣衿。
王生不作譚玄想，誰識先天太極心。

和王石門韻

幾度寄書長不達，忽傳佳句又殘年。
官清俸薄出無馬，門近溪深步有船。
萬石鐘鳴寸筵扣，千鈞鼎重一絲懸。
多君道氣偏憐我，老却容顏欲學仙。

送胡右文

乾坤清氣與誰分
江浙今稱胡右文
秋色三分閩海路
詩情一半越山雲
無錢愛把青荷葉
有興閒書白練裙
若見大蘇煩問訊
君家兄弟摠超羣

朝宗進士和韻有懷

綠綺不傳天上譜
白雲自是畫中詩
苟知處世二宜去
何必操心六出奇
杜甫無家長作客
虞翻多病老如期
相思瀧瀧階前水
流到西湖月上時

和蔣震夫時寓靈山

諸公天上送將歸處士今占屬少微路轉山亭迷宿霧
水衝村碓搗殘暉青春賈誼多才達白髮馮唐與世違
遙想石楠花正發避人時有竹雞飛

聞仁澤病手詩以代問

天公愛子凌雲氣故使從旁袖手觀好待持螯居澤國
未妨遮日上長安始知吾道屈信易誰信時情反覆難
漣統千金有良藥相逢莫放酒杯乾

如君自負經綸手休戚從來付大觀每恨有時憐契濶

却教無使報平安風流莫惜韞鷹俊強健何慙舉鼎難
想得畫屏圍宴坐一林新笋落花乾

國寶先生手疾未愈再用韻以贖踈慢之罪

先生大筆真燕許絕學從今得重觀釣掣鰲頭猶矍鑠
杯除蛇影便輕安劉伶可作尊拳懼石勒翻思毒手難
往事悠悠付千古煮茶聊沃渴喉乾

伏讀仲安雅製不覺技癢再用韻以謝

眼看棠樾只三里軋軋小車隨意行綠樹響時疑雨至

青山缺處許雲平
新詩大似有聲畫
老手何妨倒著綑
拂拭菱花照顏面
肯教顰白可憐生

和子靜先生韻
畬見梅兄希賢姪

紛紛作者何須數
惟有先生學古心
寸鐵不持嗟往昔
騷壇高聳見當今
忍聽舊侶山陽笛
宜效諸生洛下吟
白髮吾翁清裁遠
淒涼幾向夢中尋

分明李杜雖同世
見面何如直見心
稍稍詩存賦比興
寥寥人有去來今
一身萬里長為客
二句三年費苦吟

雨後江村沙路穩何時騎馬定相尋

再用韻酬叔固

小窻趺坐愛春餘落盡梨花夜雨初
客裏兩斟新歲酒歸來頻得故人書
自知黃綺無時調不是嵇康與世疎
總角論交今長大清溝慙愧映汙渠

後山植華有感

每愛幽居詠考槃何須飛夢到長安
碧藤自起四五尺紫竹新添三兩竿
長短鶴鳧隨物好方圓桷鑿合時難

山中道士偏憐我，近寄華栽滿藥闌。

叔固游齊雲巖詩以寄之

離羣索居已多日，穿深度密遍幾峯。
草長雲中知是木，人行澗底恐非龍。
夜斟白酒新開甕，曉讀丹書旋啓封。
我欲藤床試春夢，莫教道士誤鳴鐘。

華於春莫偏饒意，詩到休易最好峯。
半夜生風誰弄笛，滿天吹雨客呼龍。
時情切莫爭蝸角，世事何殊夢蟻封。
真武祠前三昧酒，齊雲巖畔一聲鐘。

叔固有惟恐闍黎鉢後鐘之句再用韻以解之
古歛舊聞丞相里海寧今拜丈人峯肯教微利蚌持鷸
不使竒才蛇作龍萬里星辰皆北拱九重宮闕願東封
如君合是青雲器好把功名上景鍾

和志亨項村留題韻

不憚黃塵二十里來穿綠暗兩三村愁中每覺羈懷倦
醉裏都忘世事繁溪女漾紗春雨霽山翁曬藥午蜂喧
早聞此地宜歸隱未信時人許細論

用畿字韻謝汪處謙先生新詩之辱

古今爭戰一秤碇試看長安摠舊畿
天地無情吾輩老江湖有恨故人稀
百年地僻惟耽酒五月山寒未卸衣
咫尺城南親舍在白雲稍稍傍蒼飛

泰華山高滴翠肥觀光猶記上京畿
百王制作于今盛萬國來朝自古稀
人品合陪青瑣闥官階已製芟荷衣
侯芭慚愧登門早事業無成鷁退飛

送王伯恂兼寄南院諸御史

倦予已理登山屐送子今撐上瀨船六月官冰偏止渴
去年臘酒不論錢且從句曲尋茅固好向金陵覓謫仙
二十四人驄馬使豈無一紙薦章傳

送郭彥辰如杭歸省兼寄陸菊逸

白頭親老初為吏青眼誰能定薦賢浦口月明天似水
湖邊雲起屋如船每逢李白酒必醉此去陳蕃榻又懸
萬一故人相問訊南山射虎過年年

和石松友端陽韻

風風雨雨過端陽閒看山雲低度牆舊日曾為白下客
諸公同進紫霞觴病身剩蓄三年艾學道寧懷一宿桑
醒讀離騷渾未忍忠臣雖死骨猶香

和徐方舟過水西寺

我愛題詩水西寺深潭白日有龍眠萬山蒼翠常飛下
六月炎蒸不到前肯為簿書苦羈束且容杖屨恣攀緣
老禪說偈如翻海一箇猿啼隔竹烟

和偶題

百年光景只春華隨處東風燕作家西寺題詩還可和
南城賣酒也能賒晴天愁寫弟兄鴈老圃新生母子瓜
不見陳蕃能下榻高情孤負白雲茶

和度芙蓉嶺

何年玉女采芙蓉夢入閒雲十二峯僻野曉行常畏虎
深潭晚浴不逢龍風回上界疑搖珮語落空林似響鐘
說與桃源後來者祇愁幽閒易迷踪

和賦星源風景

千巖萬壑星源郡恰似乾坤斧鑿初
遶屋晚陰堪繫馬
平橋秋水可罾魚
硯多洗墨詩痕露
印每封苔官事疎
第一人家燈火鬧
小兒都誦晦菴書

送湯君濟赴廣西憲幕

湯郎意氣浩如霓
白馬雕鞍新鑿蹄
試吏早從公府薦
徵書親自薦官題
江天露洗星辰濕
海島風生瘴雨低
聞道紀綱多暇日
滿庭榕葉鷓鴣啼

皓月如銀老桂秋
明朝催動孝廉舟
江山迢遞三千里

廣海東西四十州
荔子輸官供酒盞
檳榔留客當茶甌
清心莫飲貪泉窟
霜壓黃茅瘴已收

送程壽卿奉差之湖南帥府

幾年江左長相別
今日湖南又遠征
裘馬郎君曾試吏
詩書元帥不論兵
雨餘衡岳朝雲合
帆落洞庭秋水生
聞道黎民逢治世
竹枝歌好月三更

僕自己卯留宣城
庚辰留容山
辛巳留建鄴
壬午留槐堂
凡四歷重九不預
茱萸之會
詩寄家

兄敏仲友人定夫一笑

四年不預茱萸會欲倒西江浣渴心弟勸兄酬俱契濶
天高地迥獨登臨忽聞紫鴈愁先破未見黃花意更深
眼底故人多白髮秋風哀謝畏知音

和張公子登譙樓兼呈李侯

火後淒涼嬾上樓滿天風露屬深秋山圍平野東南濶
水傍孤城日夜浮懷古不堪心惻惻謀生轉覺事悠悠
題詩賴有知音在李廣如今老已侯

和王運同思歸韻

平生節操許誰過，滿面霜風白髮多。
文體暗中知沈謝，詩情裏裏得陰何。
功名大似夢槐國，身世不須營蠶窩。
却笑江州老司馬，青衫未肯換漁蓑。

日者留海寧叔固寄以佳什，走筆奉謝，無簡惠
翁賢父子

詞源衮衮學三餘，雅愛應推屋上烏。
坦腹右軍高衆子，低頭東野愧吾徒。
翻翻木落天容淡，可可梅香夜氣孤。

把劍喜逢吳季札

屬元珍

功名隨意取長途

送汪生彥通之廣信

傳心已得曾參學
薦口翻慙鮑叔知
荆說松廳名譽早
也趨蓮幕簿書期
鳳凰臺上朝攜酒
龍虎山中夜賦詩
指日閩南應過我
幾家烟雨荔枝垂

和汪生彥通韻

猶憶相從紫陽里
雨晴屋上見青山
讀書不似向來好
應俗何曾半日閒
自草太玄生白髮
誰餐大藥駐朱顏

查君吏隱玉溪側只隔隣封可往還

四用韻有懷諸家兄

近來最苦憶鄉里飛夢遶遶繞故山兄弟半隨江雁散
生涯正似海鷗閒柳條春早緘新眼楓樹霜嚴學醉顏
馬上吟詩常日晏路人笑指不知還

二月六日偕善先羅照磨游武夷舟中有作

谿水粼粼淺見沙隔離知是野人家心忘濁世無過酒
面對青山自啜茶三尺蓬窻低似屋數株桃樹爛如霞

武夷若許尋仙路為借西風八月槎

筆勢翩翩錐畫沙相逢况是老詩家
廣文官冷常無飭使客神清只愛茶
苔蝕殘碑忘歲月樹籠古洞隔烟霞
幔亭宴罷無消息欲駕張騫海上槎

梅花香月印溪沙絕勝西湖處士家
仙品未餐丹鼎藥官租已課碧雲茶
松窻不散連朝雨石屋猶棲太古霞
春水斷橋迷野渡一雙幽鳥立枯槎

送陳進善偕趙憲郎之浙西

聲名久屬趙清獻家世咸推陳太丘千里江山辭建業
一帆風雨到杭州藕花白白湖邊寺楊柳青青郭外樓
幕府若逢相識問幾年閒却釣魚舟

題劉子靜藪芳堂詩卷後

乃祖宜山建石門書院

爾祖椽題舊匾存遺芳百世在賢孫心傳信有芝蘭種
手植都無荆棘根九夏風生泉滿洞三更月轉石為門
買舟欲覓青田縣雞犬人家第幾村

寄王達善山長

猶憶金陵佳麗地于今契濶已三年斷雲不見江東樹
明月曾歸剡右船茅阜觀中蒼木煮石門洞口白猿懸
翰君仕宦偏蕭散疑是王喬跨鶴仙

寄程叔固

向來曾坐丞相府天上圖書世罕聞鐘鼎王侯俱泯迹
衣冠兄弟尚能文山深竹塢懸青雨晝靜松窻留白雲
老子婆娑醉槐下風花幾片度斜暉

風餐水宿月為期百丈牽舟上石磯塵世難逢丹竈術

浮生易歎白頭非九華天晚雲堪掬五老峯高鶴未歸
醉讀離騷龍出聽滿江烟雨濕霏霏

題橫野樓

夜涼天地疑無暑雨過溪山都是雲野色每從樓上得
秋光肯向市中分憑誰喚起遂三弄容我借來鶴一羣
定有仙人沽酒醉海波新染白榴裙

寄吳子靜先生

攜家喜近丞相里水遶青山山遶村問字有人時載酒

催租無吏夜敲門
栽華帶雨生新子
覓竹和泥長舊根
他日可名王粲宅
井邊曾洗墨香痕

和鮑縣尹心田道院設醮韻

神光曾遇泰山尖
後世侵尋禮法纖
黃紙丹書知尚敬
太羹玄酒味方甜
瑞雲靄靄常圍座
仙鶴翩翩不下簷
寄語郎官名父子
定將繁祉錫安恬

王和夫新遷樓居乃曉山劉先生故宅也溪山
好景吟所未盡必待吾和夫發之次韻奉賀

笑拍闌干喜共臨元龍豪氣冠于今山雲擁樹天開畫
野鳥呼晴客醉吟春老花飛頻點硯夜長松韻當鳴琴
誰知王粲登樓賦不減依劉夙昔心

送羅季端學錄二首

學舍如舟擁半氈每從談笑共蟬聯床頭酒熟陶元亮
驢背詩成孟浩然煙抹松根山列畫雨添沙嘴水鳴弦
歸來兄弟俱無恙不用看雲白日眠

莫遣吳霜侵二毛官資遲見著青袍祠成徽國名垂遠

詩到宣城格愈高，月轉野花香寂寂。
雨籠溪樹響騷騷，扁舟明日南陵道。
玉尺魚肥水半篙。

次韻陳敬所高吟之辱二首

牆角踈筠障碧空，脩脩時動故人風。
幾行漢隸用心苦，數解唐詩厭俗同。
夜雨對床忘契濶，西窻剪燭話窮通。
何如覓酒襄陽市，拍手羣兒笑醉翁。

尚憶元龍意氣雄，高樓晴捲落華風。
別離未覺三秋遠，咫尺常懷千里同。
近郭晚山嘉樹合，孤村春水小橋通。

白沙溪竹渾如畫我欲攜家學釣翁

題彭正卿竹溪吟卷

何妨結屋清溪上領取琅玕萬箇風淇澳有詩生筆底
渭川佳境在胸中月明沙淨搖踈影雨過波深長舊叢
借問籜龍今幾尺會逢雷震嘯長空

暇日登尚絅秀才樓居率成四律以賀

石耳山高眼界開寒英端自九天來重重銀屋花成簇
粲粲瓊林蝶作堆三十六峯非地肺萬八千仞即天台

主人儻不厭賓客且盡尊前斗大盃

仙人自古好樓居又見崢嶸百尺餘十里嵐光浮畫棟
半天雲影護殘書登臨王粲賦初作偃卧元龍氣不除
歲晚相過頻剝啄湘簾共聽雨踈踈

天上歸來髻未華多應勾漏問丹砂祖孫百里德星會
父子一門茂宰家無復山河加鐵券空遺雨露浥黃麻
老生奔走閩南道曾見春風滿縣花

師山山主文章伯有弟能詩妙活人坐擁落梅終日雪

夢回芳草滿池春光華海上三珠樹祥瑞人間一角麟
小阮近來書更好蠻牋半幅筆如神

伏讀高昌僉憲公唐律十有二首愛其清新雄
傑殆本天成非吟哦造次可得韓退之慕樊宗
師文蘇子瞻擬黃魯直體惟其有之是以似之
區區雖欲效顰第恐唐突西施耳

宣城見說張公洞白鹿金華兩度游恰似桃源居有屋
渾如海市釣無鈎火然犀角千年夜水滴冰壺六月秋

仙子不來芝朮老功名何必願封留

右和游張公洞

猶憶乘槎醉眼開而今世變總蒿萊
山連北固相將斷雨隔西津不過來
佛占祇園銀作界人游蓬島玉為臺
幾回欲話興亡事月落潮平未盡哀

右和甘露寺

人品東南第一流幾回徙倚豁吟眸
鴈鴻有信江淮曉草木無言天地秋
蕭寺僧歸燈影亂秦樓人醉笛聲愁

當時記得傳香使
鼉鼓逢逢催發舟

右同前

九華萬仞勢嶙峋
滿路梅花冷笑春
瀛海難求丹竈術
塵寰易歎白頭新
時情恁使鯤鵬化
心事偏宜魚鳥親
霧閣雲窻仙可遇
吾將此地托比隣

右和過九華山

繡衣驄馬歷長川
正是江南九月天
樹似曉霜纈紅葉
山如秋水浴青蓮
賈生才調非今士
坡老形容是古仙

回首林間一茆宇聽風聽雨過年年

右和見九華山

慷慨誰能發浩歌此生此日且橫戈
千金寶甲來徽境萬斛樓舡下信河
江鴈不知秋色老天鷺偏向柳陰多
繡衣使者經行地紫蟹紅菱酒作波

右和江行

上方見說謫仙游雨挾風聲悞作秋
院院松篁山列障時時澗壑水鳴球
屠龍未展平生技駐馬聊為半月留

僧病懶披雲水衲折梅和雪浸茶甌

右和水西寺

杜甫無家長作客次公非酒亦生狂好將天上三秋露
散作人間十月霜健鶻翻雲詩律俊驚蛇入草墨痕長

白頭才盡江淹筆安得聲名擅最忙

用揚可
久韻

右和秋日分司

新水纔流一尺深重來洗耳更鳴琴畫存粉墨多蕭瑟
詩重璵璠幾陸沈日出潛魚迷雪礪夜閒羈鳥滑霜林

謫仙天寶遭離亂長使英雄折寸心

右和水西寺風光軒

猶憶詩成奪錦袍傳宣光祿賜香醪始知宦海夢初破
頓覺禪林味最高千里空濛皆雨露萬山起伏即波濤
分明上界多官府未必羣仙領六曹

右和夜宿靈山

狂風扶掖上層巔不見窳區祇見天白石煮香如飴軟
蒼松蛻骨似龍懸盤旋上下羊腸路經緯東西鴈爪川

何許飢猿啼一箇道人驚起不成眠

右和復登靈山

青天為幙望邊開未許軒轅駕鶴來坐久溪山出圖畫
夜深星斗掛樓臺剛風不動擎天力未俗須煩砥柱才
王粲登臨應有賦人間萬事等浮埃

右和題胡伯庸皆山樓

和程仲庸齊安所寄佳作二首

蕭蕭白髮遇明時老我懷人只自知禁令已孤千石酒

娛情又負一枰棋風流赤壁周公瑾薄倖青樓杜牧之
二子齊安遺跡在悽涼莫把笛聲吹

市酤無處典春衫世態年來百不堪魯國兩生曾未起
翟公門客豈應慚寒催修竹懸青雨暝鎖羣峯擁翠嵐
何日相傳戎馬息老夫乘興到河南

送歐陽舍人

籍籍賢侯繼世勲眼看稚子更能文讀書溪上一蓬雨
對酒山中滿屋雲鶯語垂楊知喚友馬嘶芳草悵離羣

明宵竹所談
碁處敲落燈花轉憶君

雨中胡思立下顧知受學于安道洪公因有所

感

寂寂衡門久不開
何嫌屐齒破蒼苔
談詩未覺古風遠
逢客真成今雨來
簾捲飛花閒晝永
窻空啼鳥訴春回
絕憐放棹無安道
雪滿溪山近釣臺

載效唐律二解
兼寄弘甫夏君

莫笑儒官雞肋微
精廬相對水雲西
讀書蓬底春雨細

別酒樓頭夜月低
鸚鵡醉時丹荔熟
鷓鴣啼處落花迷
白頭故舊如相問
半紙新詩亦懶題

幾回醉倚碧琅玕
滿袖清風客未還
買硯忽辭朱子里
抱琴又入武夷山
茶收暖焙園丁喜
布割寒機村女閒
應想故園圖畫裏
石榴花發小柴關

白雲集卷三